

文

莊

集

十

1

2

3

4

謄錄貢生臣苗序瀛

謄錄監生臣汪葆

謄錄監生臣李光緒

欽定四庫全書

文莊集卷二十八

宋 夏竦 撰

祭文

中書祭故太尉尚書令王文貞公文

炎正宣精昂靈儲粹載降英賢允懷明懿心有常照材
無定器沈寂內融矜嚴外賁潤色暮訓藻麗詞豐周旋
相近識茂言忠爰裨袞職克亮天功疇咨熙載若時登
庸慮善興謀協中布畫靡卹人言務均王澤內靖九流

外清四貉畫像雲臺鏤勲丹冊蘿圖錫祉飈御延禧梁
陰讓德睚壤奉祇朝元景毫薦號真祠交闕祕藏首贊
鴻儀懿彼嘉猷邁茲亨會曠古難偕前良罕對異寵雲
游隆恩澤霈禮絕地尊功高貴倍封踰萬室位冠三階
憂民瘁志體國勞懷辭榮中鉉進秩東臺叩閣斯切出
綍終回洊陟上公靖顓司館霜露增憂龍蛇起歎玉塵
停揮瑤琴罷玩疹積膏育身悲夢幻青霞難挹瓊藥無
徵太醫連袂中使盈庭載紆詔蹕深惻皇情拖紳猶對

逝水俄傾痛極殲良哀深撫几制服推恩易名進美宅
兆將安塗芻既備衢巷輟春都城罷市某等早陪伊鼎
獲奉蕭規情條共慘嵩恒方隳徘徊素館顧慕容衣恭
陳宿奠永隔清徽

行狀

故金紫光祿大夫行尚書工部侍郎致仕上柱
國彭城郡開國侯食邑一千三百戶食實封四
百戶贈刑部侍郎朱公行狀

曾祖起皇唐大理司直

祖泌皇唐夏州安撫判官檢校比部員外郎
父葆光皇唐江陵府當陽縣尉累贈戶部郎
中

潭州衡山縣紫蓋鄉雲峯朱昂字舉之年八
十三

公世京兆漢陂人唐天復末烈考避地穰中梁太祖革
命與唐舊臣顏充李濤等數十家南趨衡嶽下每冬至

歲旦必序立于南嶽司天祠前北望號慟日月昏曠天
地悽慘殆二十年淪喪垂盡唯李濤一族北歸公以家
世儒業與進士熊若谷鄧洵美力學有朱遵度好讀書
人謂之大萬卷謂公為小萬卷時中國多故四方幅裂
躬侍老母急於祿養嘗與友婿張惲間行路出廬陵遇
道士謂之曰非久中原當有真主混一天下公仕至四
品安用南為遂北遊江淮遇周世宗南征招討使韓公
令坤至揚州公杖策軍門告以治亂方畧韓公器之使

知永真縣事兵革之際逋逃過半公便宜綏輯歸者七千餘家韓公表授永真令秩滿南歸太祖皇帝即位故相國李公昉以給事中出使湖外物色異人公與東平呂夔入謁傳舍李公延見甚喜尤加賞識謨南征錄云朱呂二君甚可語道泊李公就知衡州奏公為錄事參軍秩滿調授襄州宜城令尋除太子洗馬知蓬州又就知廣安軍時渠州妖賊李仙聚衆踰萬劫掠軍界公設策擒之果台渝涪四州之民連結為妖者一切不問實

人遂安時宰相薛公居正謂公有斷而識體遷殿中丞
知泗州太宗嗣位江表初平李氏銜璧吳越獻地使駟
係道舟車蠶午共億餉饋倉卒畢給聚淮濱流屍三千
為冢瘞之有戍卒謀亂公止誅首惡悉貸枝黨人感其
惠淮南歲漕米三百萬石公督其程運左右漕事朝議
美之就遷監察御史充江南轉運副使職滿知鄂州未
幾加殿中侍御史充峽路轉運副使就遷庫部員外郎
充轉運使受代歸闕太宗問以夔峽邊事敷奏稱旨命

直祕閣面賜金紫時年六十有五在職二年以衰老求
郡出知復州宰相李公昉洎文館近職皆以詩送行到
郡暮歲上表乞致仕不允次年郊祀改元至道遷水部
郎中復乞致仕太宗謂宰臣朕知此人可召赴闕既至
再命直祕閣又二年兼越王府記室公雅正好禮王甚
憚之眞宗即大位越王封雍王公亦改雍府記室明年
遷司封郎中知制誥兼判史館時上以館閣舊書編簡
散墜命公同內臣皇城使勝州刺史劉承珪與判昭文

館集賢院完緝殘缺區分部類事畢上其目加吏部郎
中職如故明年以本官充翰林學士周歲公年七十七
矣歎曰少值亂離老遇清世被知獎顧邈疇列草枯木
朽其將柰何遂抗表請老便殿召對敦諭再三志不可
奪乃授工部侍郎致仕翌日命閤門祇候內殿崇班張
士宗就第賜器幣舊制致仕官授訖放朝謝今刑部尚
書薛公映時知制誥上特命映就公第召對從容獻納
漏下數刻將退復曰卿閒居多暇無忘公家或有章疏

可附遞以聞又問以歸老之地公奏以嘗從事江陵有
敝廬可以自蔽翌日命賜全俸公懇讓數四方允其請
勅荆南官吏曰朕以朱昂素有儒學方居內庭拜章退
身其志不奪授貳卿之秩表尚齒之恩斯為賢臣實可
嘉獎仰本府候朱昂到日常切存問有表章附遞以聞
仍詔公候秋涼戒路發日命兩制丞郎三館臣察祖道
於南薰門中使賜宴於玉津園冠蓋盈路供帳甚隆榮
動中外光震都國明年開封府秋試進士遂以玉津園

宴送朱翰林歸渚宮為詩題為時所貴尚如此舊相張
公齊賢洎諸近臣有詩五十三章禮部尚書知開封府
溫公仲舒有長韻詩一章和者一十三人朝野榮之公
始至家病瘥復有詔撫問之曰卿閣筆鼈禁挂車渚宮
言歸當隆暑之時行邁有長途之役諒因勞止暫染微
疴況卿自樂高年素知善攝宜加頤養以就痊平眷顧
之懷寢興無已疾愈但閉戶靜居不交塵雜專以讀書
養素為樂深達釋老之旨自稱退叟所居東偏有官隙

地數畝詔以賜公遂建二亭一曰知止一曰幽棲有仲
弟協時為主客郎中佩服金紫以書招之協亦請老來
歸時人榮之比漢二疏數年著資理論三卷凡六篇上
之論時政賞罰得失及言天下至廣尤須賢才以為治
具若限以常牒則英雋之士沈於下位上嘉之降詔獎
諭曰卿文學俱優踐歷斯久竭節已彰於躬行退身自
保於安寧猶勤愛戴之心以備討論之典頗資理道深
體純誠勉順休和宜知頤養其書仍付史館同州觀察

使李公士衡為荆湖北路轉運使以公所得卿相餞行
詩刻石於承天院今龍圖給事中陳堯咨守荆南日視
揭榜以公所居里為東西致仕坊景德四年公豫撰墓
誌月而不日以季夏二十三日捐館朝廷哀悼賻帛百
匹錢十萬米酒麪有差賜孫适同學究出身非常典也
門人私謚靖裕先生禮也先有廖圖者與弟凝姪融居
南嶽皆工詩有名于代世有家法公娶圖女封姑臧郡
君至次子正辭之升朝也贈太原郡太君公贈刑部侍

郎公善誨子弟博貫儒術男五人長正彞進士及第仕
至光祿寺丞次正基今為殿中丞同判彭州次正紀今
為潭州湘鄉令次正用今為左侍禁知欽州次正辭年
十九進士及第今為太常博士江南西路提點刑獄勸
農使賜緋魚袋姪頓進士及第今為司封員外郎知隨
州正旬進士及第終江陵府監利縣主簿正臣進士及
第仕至太常博士三司戶部判官諸孫用蔭見任殿中
丞縣令主簿者五人女二人長適故左正言直史館兼

直祕閣夏侯嘉正次適今尚書右丞集賢院學士馮公
亮其積德至盛有如此者公操履方重志節清白歷官
四紀家無餘財淡於榮進深恥流競為太子洗馬十有
五年未嘗屑意在禁林非公事不至兩府所得之物取
三之一散購竒書躬自補綴是正文字及其退居有書
萬卷太宗皇帝之在位也製九絃琴七絃阮多士獻頌
第公首下詔褒美真宗皇帝初授徽冊公奉制譔文辭
體深厚尤為大筆其餘述作甚多常鍾愛今太博以為

紹我家事者此子公沒後太博歷官皆有能聲孜孜為
學編次公平生所著為三十卷今相國司空太原公序
引冠篇見鏤版行於世夫紱冕在躬飾表所以招累公
歷事三朝訖無玷毀其清慎者也血氣既衰入朝所以
忘返公懇辭近職甘於退伏其高尚者也死生之變智
者怵焉公豫決大期順物之化其達生者也家庭之訓
昔人難之公躬導諸子厥後甚大其善教者也舉是四
節足為名臣恭叙遺芳敢告太史謹狀

贈太師中書令冀國王公行狀

公之先周王子晉之後世家太原唐末高祖諱遐隨曾祖冀公倅江西廉幕始占籍新喻祖鄭公生而警悟三歲冀公教誦書日數百言七歲遂熟五經偽吳順義初賜童子及第弱冠偽唐調偽授本縣尉屢宰劇邑陰布德惠專以寬刑利物為意諸郡累表為戎佐仕至常州都團練判官檢校水部郎中通判軍州事歸朝終于濠州團練判官父晉公幼有志節刻誦墳典江南明經登

科選限未選復舉五經與故龍圖閣學士刑部侍郎杜
公鎬同榜擢第特授本縣尉治有風迹秩滿而終初晉
公侍鄭公任鄂州通判日秦國夫人有娠就蓐之旦江
水暴溢將壞廨舍亟遷于黃鶴樓既夕生公或言漢陽
居人遙望樓際若有氣象公幼而秀異資性機敏六歲
丁秦國夫人之喪十二鍾晉公之戚哀瘠以禮有如成
人初秦國夫人疾啓鄭公曰此兒生時頗有異將大王
氏門戶願愛之鄭公視如子保育于魯國夫人教于家

庭不就外傳涉獵書傳詞筆早成鄭公之在冀幕也公甫十八太宗皇帝弔伐大鹵譔平晉賦論獻于行在而還鄭公益竒之待以賓禮鄭公移濠梁公應進士舉將拔覃懷解鄭公三止之曰吾年七十有三恐不逮汝之返也公既行踰時鄭公忽一夕沐浴易衣會家人置酒夜分疏記後事且曰吾厯官五十餘載慎刑罰活人多矣後有興者其在吾孫乎遽捨筆就枕而薨府中聞樂聲泠然公淳化三年第十一人擢第釋褐試祕書省校

書郎亳州防禦推官勵精吏職屬朝廷遣著作佐郎直
史館曾會中使李知信察近郡風俗吏民狀公政迹會
等上之有詔褒諭就遷防禦判官加文散十階尚書屯
田員外郎舒公薦公藝文可稱溫裕有素特改祕書郎
司市征于淝上眞宗即位就遷太常丞時大統初集急
于用人詔近臣舉轉運使副三司判官給事中喬公維
岳首以公應詔召赴闕主判三司憑由理欠司賜五品
服公抗疏請盡蠲宿逋用廣寬惠辭甚詳切上嘉納之

未幾命宰府召試孝為德本頌授右正言知制誥歷判大理寺審刑院賜服金紫三年權知貢舉召入翰林為學士時蜀寇始翦反仄未安朝廷切于綏集以公充西川安撫使寬宥枝黨蠲去逋租驛奏便宜大愜上旨趣遣使召還授左諫議大夫參知政事明年郊祀加給事中景德中契丹寇北鄙駕將幸澶淵特加工部侍郎判天雄軍兼兵馬都總管並參豫如故敵騎引退王師凱旋公以台席不協懇退時柄遷刑部侍郎上特置資政

殿學士員以處之有司定議班在翰林學士之下尋充
南郊鹵簿使禮訖撰鹵簿記上之改兵部侍郎充資政
殿大學士位在翰林承旨之上尋知承進銀臺司兼門
下封駁三年遷尚書左丞知樞密院事修國史明年瑞
命集於東闕改元大中祥符泰山父老請紀云岱公首
建大議將明上志遂以公充封禪制置禮儀使兼判充
州禮畢加禮部尚書受詔撰社首壇頌加戶部尚書從
祀睢丘加吏部尚書並掌機密明年加檢校太傅充樞

密使同中書門下平章事有詔仍帶天官之秩九皇降
格加檢校太尉七年罷樞要以吏部尚書奉朝請再典
銀臺之務未幾復拜樞密使如故九年典校道書畢加
檢校太師尋兼羣牧制置使明年改元天禧上玉皇寶
冊禮畢加右僕射尋兼判禮儀院充會靈觀使亟遷左
僕射兼中書侍郎平章事監修國史明年充景靈宮使
都總管判祥源觀事三年授太子太保判杭州歲餘召
還復為資政殿大學士加司空尋制授山南道節度使

檢校太師中書門下平章事判河南府輿疾還第除司
農卿分司南都今上即位改祕書監分司如故旋起授
太常卿知濠州遷刑部尚書知江寧府天聖元年九月
詔還制授司空門下侍郎平章事充玉清昭應宮使昭
文館大學士監修國史真宗實錄畢加司徒二年郊祀
封冀國公三年冬十月兼譯經使赴上于傳法院歸第
感疾請告踰月詔使國醫相望于道十一月丙午聖駕
臨問賜白金五千兩戊申薨于東京永定坊第之正寢

遺命歸葬濠梁從祖塋也翌日皇太后車駕臨哭出涕
制贈太師中書令輟朝三日遣起居郎直史館修起居
注李仲容攝鴻臚卿護喪內侍省都知雅州防禦使韓
守英副之官給經費十二月乙卯上內殿成服哀榮之
禮近世無比公五子並先公而亡次子從益仕至贊善
大夫第三子慶之終于衛尉寺丞追賜進士及第女二
人長早亡次適大理評事張瓌故參知政事洎之嫡孫
也孫女一人適太子中舍陳執禮故尚書左丞恕之子

也外孫女一人男一人並幼遺奏之上嗣男將作監丞
寅亮詔授大理寺丞諸父比部員外郎判尚書刑部司
農寺仲微素負吏幹累更事任特授司勳員外郎餘戚
屬授官者九親信錄用者十五人夫人李氏世本名宗
允懷淑德累封崇國夫人公嘗言往歲曾行圃田宿村
舍夜起視天中有赤文成紫微二大字光耀奪目使蜀
還褒城路中遇異人視刺字乃唐相裴度晉公告公以
默定之語而隱公之貴也遂留心羽化之事凝神雲漢

之表多用道家科儀建壇場以禮神朱篆紫微二字陳
于醮所以餘俸脩晉公祠于圃田自撰文書石以紀其
事永定在御真蔭方隆謁欵神靈對越天地尊尚道德
布宣符瑞創圖訪對多自于公注意沃心無與為比若
乃頌祇睢壤奠璧瀨鄉抃恭謝之壇增耀魄之號公皆
為禮儀使法駕之展盛容也奉寶文以先道公繼為天
書禮儀副使同天書儀衛使路寢之尊景命也披帝籙
以肇宣公為讀天書禮儀使良金之範真儀也公為迎

奉聖像禮儀使溫王之勒乾文也公為天書同刻玉使
前後所賜手詔璽書無慮二百函奉和御製及御和賜
所進歌詩僅三百餘首初罷參庶務備問內殿特賜宸
章辭極褒賁西鎮洛師南撫澗水皆有睿作寵行榮冠
一時事超千古逢辰之盛理絕名言尤善筆劄勢甚峭
勁自成一家老而益壯好奕碁以自娛嘗奉詔撰集翊
聖保德真君傳三卷先天紀三十卷五嶽廣聞一百卷
與諸賢同撰集冊府元龜一千卷彤管懿範二百卷又

奉詔撰僖祖太祖太宗謚冊今上徽號冊文汾陰朝覲
壇頌西京應天禪院大原資聖禪院碑銘天書祥符贊
彤管儀範序廣孝泉崇真橋記再耕封東平公贊皆為
大筆或藏祕館或行於世公出入兩府時將二紀敏于
見事詳于敷奏智術過人慎勤無及朝廷大議帷幄潛
慮或造膝以言或密封先達詭詞焚藁世莫得聞其茂
功懿績藏在盟府景行嘉猷播諸物聽謹次官闕敢告

良史謹狀

墓誌銘

故金紫光祿大夫檢校禮部尚書右神武衛大將軍致仕使持節康州諸軍事康州刺史充本州團練使上柱國開國伯食邑七百戶贈鎮南軍節度使太原王公墓誌銘

夫天人之際疇德以交神明之後因聖斯啟故在漢則太一下降著畫法於壽宮在唐則氣祖有言告鴻緒於仙李帝祚炎宋真陰在天挺生異人潛達靈命清徽既

往故可得而紀焉公諱中正字平叔本名捷汀州長汀
縣人也其先緱嶺疏源將兵者三代太原辨族世祿者
四方累紫重金實繁於京洛分枝辨葉或播於甌閩禮
讓傳家鄉閭觀法至公曾祖安卷道懷寶洒落塵迹與
物無累越世自高迺後李氏據有江表急於聚兵王父
靖以州里之豪屈致戎校偽置百里指揮使烈考成以
事繼烈軍始終於偽置宣猛指揮使累贈左屯衛將軍
然皆命不逢辰職非所好綽有繁祉茂啟後昆公資氣

淑均秉性淳質幼失怙恃旁無周親逮於成人勉率賈用雜良以苦既不忍為欲羸惡囂終非其樂以咸平初祀憩星子故墟偶會羽人實姓趙氏一見如舊巨測於靈契信宿後別徵有於緒言迨及其冬再遇茅嶺長房奉酒雖未入於壺中君賢負笈遂同遊於江介繼市鉛汞對成白金乃訪竒草於瀝陽辨靈液於廬岫五圖金紀授以采掇之名九井玉橫傳以合和之要仍別付靈方環劔緘滕之書戒曰非遇人君慎勿輕述寶誨方畢

煙駕俄隱公乃累詣京室求見無階還過上饒佯狂自
異坐抵常禁謫戍嶺南艱危之中顛沛之際保護所授
不敢少懈未幾靈游荐至慰其憂虞復取神劔緘書且
云當候異日時供奉官閤門祇候謝德權適總巡兵頗
聞異述及公私還轂下置對有司德權時方在朝奏請
免釋迺禮之私第鍊成藥銀上獻帝宸遂解軍籍德權
樂公之道歎待累年制伏之珍盡畀而無吝祕授之事
萬計而不言一夕潛歸追及於路靈貺幽啟睿聽有聞

始命景福使新州觀察勾當皇城司劉承珪案問之缺
甚隱惟堅請於面陳物色可知固潛與於心會承珪因
為改名中正俾詣登聞始得召見於龍圖閣下雲井之
瑞備對於綺窻栢寢之言悉驗於金刻乃授許州散掾
畱止京師多與道人偶語於市承珪詰之乃曰即授法
聖師也王君既來遂容於請見金母將至亦有於傳言
遂以景德四年降皇城司解舍紗厨中戴冠佩劔服皆
青色玉文雲襖雖亞虛皇之尊紫羽華衣迥異上卿之

貴時承珪新堂方構靈御頻格金童列侍咸佩於印章
天官時來若校於名籍承珪竊聆旅語始知乃司命真
君焉國家每欲究皇儀展帝容受乾文襲黃瑞公皆密
致真誨有開必先所以薦玉欽柴祥兆咸報起圖溢牒
見象日昭洎夫登岱勒封昭姓紀氏刻日千里之外時
無纖塵陟降萬仞之上安若平地非元真幽贊百神奉
塗則孰預於此粵以大中祥符三年加上聖號曰九天
司命天尊擢授公銀青光祿大夫神武軍將軍致仕乃

給全奉環列為重方比於鈞陳奉身甚高彌富於天爵
四年春羶牲雉上薦禮后皇金輝發於大河偉兆騰於
冀壤烏奕嘉應覺悟蒸黎乃授公本衛大將軍領高州
刺史賜勲上柱國加金紫光祿大夫階五年冬宮籓既
嚴夜漏將半彤霞采霧上屬慶霄芝蓋雲裝下臨祕殿
繇繇聖胄長發其祥翼翼帝心聿懷多福迺奉上號聖
祖上靈高道九天司命保生天尊大帝賜公爵平晉縣
開國男食邑四百戶七年春仁里肇禋嘉壇大報徽冊

登陞而密雪罷零法駕在郊而烈風遽息肝蠻之際昭
報甚明迺進公爵開國伯增邑三百戶俄以本官檢校
禮部尚書領本州刺史兼御史大夫會稽未還嘗承衣
繡之問遼東遠別甚慰華表之恩八年以分刺之權兼
榮有日諸武之衛久次當遷遂改左武衛大將軍康州
團練使皆使任如故若乃國家舉增高之典以揚鴻徽
展頌祇之儀以答貺施薦混元之號以尊妙本倬曲密
之規以事上帝法太微之制以昭祖德肇五門之宇以

崇嶽鎮新六寢之位以壯宸居在展寀之初慶成之始
咸有靈命以藥金銀為公貢獻者累巨萬數輝彩絕異
不類世寶靈喻於方丈價倍於朱提豈止丹砂可成方
為食器太山所出遂鑄褱蹄然自高真之降格也崇奉
之際唯承珪預卒後玉清昭應宮資善堂都監崇儀使
入內內侍省押班周懷政以慎重齊明嗣掌其事皇城
司新堂遂改為元符觀及承珪私第曰東宅公之通濟
坊私第曰南宅皆碧輦停颺之地太霞頓轡之所瓊干

素羽藻衛常嚴玉籟雲鈞遺響相繼唯公得奉見給使
恭侍左右焉九年秋霜露纏憂龍蛇起嘆王人臨視太
醫承詔使者半道帝夢於來言玉館在庭公知其獨召
有加之際真誨復宣曰慎密類汝者少塑形於景靈宮
為吾輔勿憂初公居甘泉坊第徙居南宅疾亟遂還甘
泉坊以十月乙亥啟手足享年五十五上嗟悼久之命
懷政監護葬事贈鎮南軍節度使仍塑像於景靈宮天
興殿之左達巷之香顯十旬之異特弔之客有雙鶴之

竒以十二月甲申寔於開封縣之汴陽鄉榭岡村娶渤海施氏累封吳興郡君以公昭贈加等特進封本郡夫人夫人生於景胄夙茂於閨風同穴之言嘗盟於皦日偕老之痛蓋極於帷堂子四人曰世寧世長世昌世融並任右班殿直學禮而立象賢以成既冠勝衣已聞於警悟作室肯構佇見於蕃昌女四人姆訓甚嚴淑德皆備奉嬪慶旅未聞鳴鳳之祥率禮公宮將奉采蘋之祭而皆靡瞻頽泣何怙銜哀孺慕無時柴毀過禮有後之

美豈曰誣哉公通簡有常慎默無比自肅祇真睠傳致
靈心非覲至尊未嘗輕泄至於黃冶所就靡敢忘施貢
獻之餘則周濟貧乏崇奉僊釋時論善之哀哉隙駟難
畱藏舟易失青鳥卜宅雖示於歸全太陰練形未知其
化去佳城既啓遠日有期慮宰木之將折懼芳猷之或
墜仰承中詔俾勒堅珉銘曰

靈王之穆世烈滋芳誓淮獻吉解佩歸祥奕葉彌繁異
人挺出性易言簡體放心逸仰緣靈契夙契元真潛通

密命昭啟昌辰慶發祥流禮交樂舉三境開光百神合
序朱房七映密侍睟容丹經九籥潛侔化工官重訓齊
任隆環衛忽痛蘭摧盡疑蟬蛻將壇追寵仙館畱形重
原既卜幽隧爰扃草茫茫兮風烈烈素驂斷兮哀笳絕
岸之曲兮水之陽露寒泣兮秋雲蒼緊夜臺兮叵測唯
令譽兮彌彰

文莊集卷二十八

欽定四庫全書

文莊集卷二十九

宋 夏竦 撰

墓誌銘

故保平軍節度使同中書門下平章事駙馬都尉贈中書令魏公墓誌銘

方國家東禪之七祀上朝景亳駐蹕睢陽肇為京都紀興王之壤永懷祖德思逮事之臣以忠武軍節度使駙馬都尉鉅鹿公親舊兼宗勳賢莫貳內出明制進位中

台赴上於鼎司接武於諸相進退體貌無與比焉越明年冬十月上齋居宣室勤卹萬區以全魏近藩朔垂右地邊圉之勢勝京師之屏翰士馬雄壯非元功不足以鎮重遂以公判天雄軍府事政治寬簡獄訟哀止吏民守闕請立石而紀頌嘉穀生境方優詔而旌美不幸起龍蛇之歎罹霜露之憂天禧元年正月國家奉有帝之冊薦尊祖之名裸鬯廟祧升煙郊兆天子均聿懷之慶舉先親之典制授公保平軍節度使相國如故且詔赴

闕肩輿就第中使相望虛中日望其有瘳搢紳方詠其
多福無何秋氣始至疾疹增劇載紆詔蹕慰以聖言俾
加勉膳之勤尚期勿藥之喜仍賜白金三百斤天不憖
遺福善則虛七月甲子以不起聞上撫几震悼臨哭出
涕書忠甲令彌念於良臣畫像雲臺方追於英烈嗚呼
哀哉真命世之賢佐生人之間傑也公諱咸信字國寶
其先大名獻兆屯固流祥西漢肇高平之封東晉啟劇
陽之士冠冕奕世譜牒聯華公之遠祖始家汲郡唐失

天命祿去王室魯王父楚卷懷琛寶遁世而長往累贈
太師兼侍中魏國公曾祖妣郭氏追封燕國太夫人王
父韜襲善以處躬含和而味道累贈中書令越國公祖
妣李氏追封晉國太夫人烈考仁溥仰承積德生蘊明
略往佐周命厥有大勲爰立鼎司兼崇樞府金印雙導
蓋極寵露之威火德應天首宣欣戴之力嘉謀懿範國
史詳焉公之受脤於藩登庸繼業屢奉明祀載洽鴻禧
有司累贈烈考尚書令追封秦王謚曰宣懿母李氏封

秦國太夫人繼母李氏追封韓國太夫人公韻字沉邃
資質豐碩積懷衽之善教聳公侯之竒表話言詳雅動
止有度初補宣懿隨使都校建隆初起家授朝散大夫
右春坊太子通事舍人先是太祖啟運立極英武睿文
神德聖功至明大孝皇帝龍德在潛人望攸屬秦國太
夫人獲奉昭憲太后太后亦降秦國之第公在幼穉不
樂戲弄瞻視審諦有如成人太后竒之始議姻戚洎乾
德五年五月太宗至仁應道神功聖德文武睿烈大明

廣孝皇帝方尹京邑遣判官劉鼇至第語宣懿以昭憲雅意翌日召公於南宮延見誨諭久之八月復召公親引對於講武殿太祖謂曰知善弓馬命射四十餘發太祖嘉之命太宗賜酒食太宗且諭之云既精射御當留意文學公由是刻志墳索耽味圖傳五經十七代史尤其該總復得三式風角之妙後太祖頻召對命射常稱其善五年三月復召赴講武殿令帶御器械黨進欽等四人同射以較其能薄暮方罷未幾太宗再遣左右陳

信召公諭以選尚之意四月復召公於內中就食廳引
對於萬歲殿賜襲衣玉帶鬃裝鞍勒馬七月永慶公主
出降特授檢校尚書右衛將軍兼御史大夫駙馬都尉
賜安定里大第一區夏屋千餘間園館臺榭備焉仍分
御溝水以灌池沼六年加檢校尚書左僕射吉州刺史
太宗即位加檢校司空超授本州防禦使仍備環列之
職太平興國元年并寇未賓寅庫再駕賜公白金三百
觔以治裝公擢五屬之甲從六尺之輿左右不違晨夕

匪懈太宗既平大鹵直趨盧龍乘百勝之氣遂乘亡之
敵將幸山北盡埽區落公與駙馬都尉王承衍從容獻
諫太宗納之三年郊祀加檢校司徒四年加檢校太保
六年特詔常奉外月加給錢十萬七年授鎮州觀察使
雍熙三年以獯鬻犯邊王師薄伐朝廷旰食冀方繹騷
太宗分命懿親藩屏近甸迺以王承衍鎮大名駙馬都
尉石守信守河陽而澶淵要區喉咽之地慎擇能臣無
易公者遂命公往撫之賜白金五千兩是年冬公以河

水湍悍舊隄回曲備禦告勞科率為患迺徑鑿新渠二
十里以直水勢繇是十餘年間無衍溢之患端拱元年
朝廷於青壇修黛耜將籍千畝而郡界河水清徹見底
味如甘醴迺盛以銀缶因公主上之中外稱賀禮畢超
授彰德軍節度使尋詔兼本州馬步軍都總管淳化元
年正月驛召歸闕公主改封齊國九月澶州河大決壞
城壁斷浮梁墊居民阻邊奏物價踊貴太宗召公於崇
政殿諭以方略令馳傳而往而賜白金萬兩今上時為

壽王賜宴於含芳園公下車之日撫疲瘵賑乏絕境內
以安先是朝廷命內殿崇班閻承翰修復河橋比公視
事久之功猶未集太宗令健行親事官日賫詔書催督
公與謀之而承翰執誼以為方冬聚凌如山水勢涌急
難為施力遽入奏乞俟來春公既餞承翰迴鳩集諸工
自乘小舸截巨浪排層冰紼纜造舟是日亟就乃遣健
步上狀承翰方入對陳難成之勢而公奏繼至太祖大
悅顧謂入內侍省都知李神福曰朕選魏某果能集

事翌日公主入賀太宗復嘉歎有晉武孟津之賞密賜
珠玉金寶時都大提點河堤崇儀使劉永恭大庀役徒
修築隄塞盛寒皸瘃人皆苦之公列上其事乞至春初
太宗遣健步賫詔自京一日而至亟命罷役五年春將
修長堤當役夫二萬公自保程其工省去大半太宗令
高班內品李信宣旨命公圖上減工在所尋降詔依之
時境內田隰水退皆填淤加肥而民漂陷之餘耕無首
種相聚愁歎坐待流亡公奏貸麥數萬斛是夏大稔民

樂輸還官緡屬不絕由是人皆處業貧者更富又以州
獄久繫逋欠官物又保任之民資產已竭追償無出公
將上言並詔蠲免今上即位加定國軍節度使公主封
許國長公主咸平二年八月講武於東郊詔充在京新
舊城內都巡檢十月郊禋充舊城內巡檢十一月以控
弦入寇邊城晏開革輅將行羽書狎至命公充貝冀路
行營都總管初無辨嚴時方鎮各控重兵以自衛公至
天雄軍始得步騎二千以隨勁敵之壘煙火相望公左

實右偽虛振軍聲倍道兼行直抵邊郡敵亦憚公威名
辟易而退尋命公男昭亮傳詔召赴行在景德元年上
親握武節北守澶淵公扈從星陳以及凱入二年郊祀
加武成軍節度復以西充奧區舊俗豪悍乃命公知曹
州先是廣濟渠兩岸積水居田千頃民用匱乏莫輸其
租公乃度其地宜置水門導之入河人獲其利州下先
多為盜逆旅之舍皆日暮扃戶賃宿者巾屨難保至公
之治也民不敢欺無夜吠之警上朝陵輦洛詔從車輿

四年曹南耆壽列奏借留朝議方以三城右地股肱劇
郡經瀆所控屯兵甚多遂輟公鎮河陽民吏望風畏憚
刑罰罕用大中祥符元年密命開先珍圖洊降上讓德
云岱歸功祖禰公屢陪近輔夙侍嚴祠禮畢加檢校太
尉二年敵使至闕宴豆屢頒上知公善弧矢命公伴射
賜予加等所以旌絕藝而威遠人也三年禋祭雉壤合
答后祇西巡之路頗遙北門之寄尤重乃命公知澶州
兼駐泊馬步軍都總管提舉澶濮齊鄆等州德清軍寇

盜公事賜銀槓大劍各十上幸瑞聖園射弓命內侍宣
旨卿每苦臂痛今日之宴不可辭也公奔馳赴召射中
銀缶上親解之賜闌裝鞍勒馬非常典也四年禮畢就
加忠武軍節度復召歸闕爾後真興昭格鉅典交修寵
命便蕃禮數尊異以至開公府正台極歲給公用緡錢
加至七百萬任兼文武寵冠勲戚實固之久居大位每
被訪於邊事杜預之既立戰功唯耽思於文籍洎出臨
魏郡也豪右屏迹囹圄屢空雅歌投壺有儒者之樂輕

表緩帶得名將之體洎染疾歸第恩禮勤渥殫太醫之
妙伎極內府之良藥命也不淑奄歸窀穸享年六十九
詔廢朝三日贈中書令內侍省部知蠻州刺史竇神
寶營葬事太常博士秘閣校理李垂攝大鴻臚監護太
常考行定謚發引之日有司具一品鹵簿鼓吹太常博
士秘閣校理慎鏞遣奠於順天門以十一月丁酉葬于
河南府洛陽縣賢相鄉勲德里從先塋禮也公一歷東
朝一踐環衛八臨藩服五換旌旄累階至開府儀同三

司策勲上柱國進爵為公食邑至一萬三千九百戶真
食四千七百戶加凌煙之號為推忠保節同德守正翊
戴功臣祿位寵榮並極人爵若乃自刺史陟防秋由廉
車正節鉞皆靡限官序度越等夷斯又國家急賢之恩
於是乎在也恭惟許國長公主太祖皇帝之第三女也
淑質純茂柔儀肅祇處約惟勤在貴能降唐襄城之禮
度為諸親之楷則漢平陽之慈愛享累世之崇重先公
十九年而薨嘗獻瑞牡丹一叢花皆千葉色潤殊絕太

祖命以一枝著金壺中盛以玉盤令待詔黃居寀圖之
以賜公主至今存焉男三人長昭易任內園使頃持使
節遠聘穹廬中塗感疾先公而沒次昭亮今任東上閣
門使恩州團練使器宇不羣識度殊遠太宗以其與王
承行男世隆皆嫡外孫特愛之幼歲召入並賜坐以昭
亮好學命吟賞花詩立成特賜緡錢御酒命共游於後
苑初未名太宗一日御筆書二名賜之曰從訓昭亮令
擇名焉起家授如京使自是每令昭亮押賜公加恩綸

告兩聚貴族繼賜白金萬兩以充六禮之用洎公正位
國相出臨魏郡昭亮往賜生辰禮物賀席方半而驛置
俄至特降綸綽授昭亮恩州團練使仍兼上閣之職聞
者榮之然而昭亮生於貴戚雅好儒術妙達時務詳練
舊章受詔同定闔門儀制廣溢甚多箕裘之業蕃昌慶
大人皆望之次昭侃今任內殿承制風度清粹操履溫
重夙稟誼方蔚為德器女二人長壽縣主率禮公宮式
瞻貴里副笄之日太宗賜白金飾肩輿重七百兩亦以

嫡孫特恩非常例也適內殿崇班閣門祇候張士宗早
亡次女蕙問夙聞薨華易落適右班殿直闔門祇候王
從益而逝孫一人東頭供奉官餘慶學稟詩書德茂蘭
玉孫女二人長適故左領軍衛將軍致仕趙保勳男宗
爽次在室皆從訓保阿照言圖史蓋宣懿之積德累仁
公之常善齊物厥後繁衍奕葉隆昌者焉及公之薨也
朝廷追錄大勳誕推延賞授昭亮四方館使團練如故
昭侃遷禮賓副使姪殿中丞昭慶遷國子博士左侍禁

昭用遷西頭供奉官贊善大夫昭文遷殿中丞左侍禁
昭素及孫餘慶並授閣門祇候初遺奏之上也昭亮以
事非禮制獨不列名又慮國恩均被遂上封預辭乞居
喪制恩旨允之斯又忠孝之訓有後之美也如是公資
性方嚴秉心純一至誠待物正色在公其出奉民政也
決事明敏嫉惡如讎彊暴讐服寃滯畢達所至之地人
皆愛之是以歷事三朝寵暱日隆太祖日於鞏洛道中
命御龍官以金盤盛含桃賜於馬上太宗嘗因寒食日

遣內侍岑保正賜御筆令召王承衍等習射於家園并
賜銀缶腥餼等後公鎮澶淵太宗射於後苑翌日以御
射中銀缶命公主賜公令書於家信曰朕昨日賞花射
弓甚思卿故有是賜其恩寵尤異也如此然公雖幼享
崇貴深承顧待而每鑒前代之戒小心兢慎過自修抑
故出入五十餘載終始無玷加以忠厚之節發於天性
一物之異不敢家藏太祖幸洛公以園第宏敞奉表獻
之又世有芙蓉丹砂一枚重將一鎰以承隙日則室中

皆明後令壽光縣主以服餌法獻於太宗旋降御筆褒
之賜黃金器五百兩近歲國家新宮闕之制令昭亮懇
奏願納奉入以助經費上優詔不允論者美之又仲兄
太僕少卿某之疾也自澶淵乞赴闕侍疾及其有加也
上章乞授少卿長子昭度一官尋授太常寺太祝其弟
悌皆此類也每好夜坐召兒姪輩諭以君子立身之道
雅合經典之意自感疾至薨氣貌不衰精識自若人皆
以為修德之報焉佳城既卜遠日有期諸子以某備列

西臺久塵吏職稔聞世德嘗奉緒言見索斐辭以識徽
烈讓不獲已謹為之銘銘曰

炎正啟運帝賚忠賢九功並建百度勤宣下寧海域仰
清垂象教化之重倚之國相內撫方嶽外清邊塵軍旅
之要付之將臣允顯魏公位兼文武槐鼎登庸節旄分
土左右王室事上以忠股肱右地待下以公獻聖之心
念功惟舊白水攀龍湛恩克懋惇叙之典立愛惟親秦
臺降鳳寵暎斯勤佐國承家謂之世德闕閱之勲載於

金石安人去患謂之民政藩屏之治播於謠詠密謀潛
慮莫際其涯獻贊帷幄惟聖用嘉高風遠度莫闕其奧
儀表紳冕惟賢是儆哀哉良相百福宜全嗚呼彼蒼何
奪之年挑荊臨喪密章加秩帝極哀悼禮贈優恤寒風
慄兮愁雲暮鹵薄陳兮班劔布卷組帳弓空煙儼靈輻
兮戒路哀笳咽兮楚挽悲邛之麓兮洛之湄從先王兮
魂不昧掩幽窆兮夜何其有旂常兮今名不朽有琬琰
兮英威可久繫似續之良賢兮永蕃昌於厥後

故守司徒兼門下侍郎同中書門下平章事充

玉清昭應宮使昭文館大學士監修國史冀國

公贈太師中書令謚文穆王公墓誌銘

并序奉
敕撰

天聖三祀歲次星紀黃鍾布序丙午建辰皇帝御琯輿
詔金蹕出景龍門幸永定坊北第視大丞相冀公之疾
賜白金五千兩戊申丞相薨于位享年六十有四兩宮
震悼皇太后車駕臨哭盡哀天子素服三日不視朝以
太子中書令告第大小歛遣尚宮弔祠法賻加等有司

謚曰文穆命左史攝鴻臚卿副內侍太監送喪官給經
費具本品鹵簿以明年仲春之壬申歸全於濠州鍾離
縣廣德鄉西原之祖瑩有詔侍臣書其徽烈公諱欽若
字定國其先緱山遠系潁陽茂緒武岡睢陵之材啟國
於晉永寧清源之德胙土於唐本居太原世為鼎族高
祖諱遂以巢寇之亂避地江楚喜玉筍之岑寂惟厥田
之沃衍始家宜春之新喻遂生遐仕至江南西道鹽鐵
巡官遐生郁幼而警悟不樂嬉戲徧誦五經偽吳童子

擢第釋褐本縣尉諸郡累表為戎佐視秩臺郎闕決郡
務歸朝為懷冀濠三州判官郁生仲華夙有志尚刻誦
墳索為唐明經中選又以五經登科復尉本縣時議榮
之公即濠州府君之孫新喻府君之子及公之貴三代
皆贈太師尚書令兼中書令曾門封冀祖廟封鄭禰室
封晉皆為國公恭惟鄭公當五代紛競仕為唐之僭據
轉側江介間闕世路而能治尚清約志在平反愛慈孫
以字升卿高門閭以容駟馬克祚厥後何其盛歟公聰

識早成性資強敏六歲喪母十二而孤鄭公愛之保育於祖妣魯國太夫人教于家庭不就外傳道藝兼該辭筆贍逸弱冠初拔進士解淳化中策高第試吏芸局從事譙幕加倅職再毗戎務被舉遷秘書郎典關市于泚上升朝為太常丞理通欠於計司以右正言歷掌內外書命授左諫議大夫再遷工部侍郎并叅大政以刑部侍郎充資政殿學士改兵部充大學士繇尚書左丞三轉至吏部尚書皆知樞密院自檢校太傅再加至檢校

太師行尚書右僕射並使東樞實兼宰職俄以左揆兼
中書侍郎監修國史對掌魁柄以太子太保判餘杭歸
朝再為資政大學士尋拜司空未幾視秩維師兼榮鉉
府節制襄岷居守伊洛輿疾還第左遷司農卿改秘書
監並分務南都起授太常卿典濠州轉刑部尚書知江
寧府召還復序正司再升中書兼門下侍郎充昭文館
大學士實首台席遂作司徒乃封冀壤勲階爵邑名數
咸極初永定在御憲章大備以駟牧之重領于樞臣公

嘗為羣牧制置使肇玉清昭應宮以事有帝崇景靈宮
以奉真祖營會靈觀以禮岳鎮並建職局綜於兩府公
繼為三宮觀使惟公事三朝相二帝嘉猷亮節深圖遠
筭秘諸信史此不獲書若夫建隆以還萬國上計辟名
既辨斷盜未償領于司存列之辭案人生有訖吏責無
窮公抗疏切陳援救蠲弛深達國體克稱上仁注意之
求實自于此咸平初寇劇緣間搖亂益部偏師致討剗
削厲階武臣尚威傷斬過當餘孽亡命反仄靡遑公往

宣使指悉貫枝黨處置機事彼方遂寧召參台衡刻印
以待景德始邊城晏開羽檄四馳烽火相照公感憤激節
慷慨請行并護將臣克全魏壁洎乎元符候日奉高望
幸三事優游而未決禮官希濶而難講公首抗大義先
置喬岳芝英醴泉之品喬雲叶氣之祥圖素寫形使驛
言狀旁午亭傳覺悟黔黎此其昭昭者也若乃尊事神
祇專精齋祭寅威妙本校正真科交集上儀莫匪嘉慮
是以再長樞軸三陟正司中外迭居左右更踐體貌無

比論議必從寵冠一時年踰二紀至若羶牲雕壤徐鑿
曲里登魄寶之號熙報况之壇奉貞像於琳宮宣寶文
於路寢宮繼掌禮儀並持使印又若明禋歲事珍符先
道聿嚴容典奉以金輿公三職儀衛殊庭考閣常籙是
藏內出丹書勒於瑤簡公同司刻玉並兼置使之重益
為希代之榮祥符之間天下大治制有破觚之易法有
漏魚之寬太和陶蒸善氣回襲雲物絢色羽毛粹質百
嘉茂育萬瑞畢臻天子好文挺睿辭以昭紹惟公順美

著嘉頌以游揚前後賜御製屬和并御和賜歌詩僅三百篇若夫入幹庶績出撫近封鋪陳密議條對急政所受詔荅將二百函又奉命纂集翊聖保德真君傳三卷撰進先天紀三十卷五嶽廣聞一百卷鹵簿記三卷與諸儒同集冊府元龜一千卷彤管懿範二百卷又封祀既畢歸尊宗廟承詔撰僖祖太祖太宗謚冊神聖纂服初受鴻名奉制撰今上徽號冊文及前後被旨撰社首壇汾陰朝覲壇頌西京應天禪院太原資聖院碑銘天

書祥瑞西祀瑞贊彤管懿範序廣孝泉崇真橋記冉耕
封東平公贊博雅多文盡在茲矣公嘗言初晉公侍鄭
公之任武昌也公母秦國夫人有娠江水壞廨舍徙居
黃鶴樓既夕而生公或言漢口居人遙望樓際若有氣
象然公居景毫行視圃田暮宿村廬夜分偶起見天中
有赤文成紫微字使蜀言旋次褒成驛有客為謁具唐
相晉國裴公之名告公以默定之期而隱公嘗朱篆所
見文字及因鄂守增飾黃鶴樓又以俸錢修圃田晉公

祠為文書石以紀之常練氣於朝霞期脫屣于塵世姚
顛承白衣之報子房慕赤松之游參實于斯諒不誣矣
雅好奕碁善于筆劄樂醇旨之飲喜清高之樂第有北
園疊石為陂甘果美木蔭庇其下退食休澣於焉游息
晚年親歷艱難頗厭富貴延問高釋留心真際遂兼譯
經使二府柄臣送上於傳法院梵卿薦香大官具食歸
第感疾請告累旬侍醫盈門詔使係道錫萬金之良藥
殫九折之妙伎天乎不弔命將柰何輟相興謠見於斯

矣夫人李氏山河象德圖史時憲哀深惟殯痛極終天
送往盡哀庇親惟睦累封崇許二國夫人有子五人皆
先公而亡內次子從益仕至贊善大夫第三子慶之終
于衛尉寺丞追賜進士及第女二人長早亡次適故叅
知政事張公洎之嫡孫秘書省校書郎瓌孫女一人適
故尚書左丞陳公恕之子大禮寺丞執禮並懿行美材
大宗良配外孫男元壽女壽姐並幼遺奏之上也二宮
哀軫錄舊念勲並加常制嗣男將作監丞寅亮授大理

寺丞瓌遷大理評事充秘閣校理執禮改太子中舍又以公叔父仲微剖竹列成累書吏課握蘭建禮實綜虞衡兼秋曹之覆刑主大農之平糴特除司勳員外郎充淮南提點刑獄勸農使自餘戚屬授官親信叙用者二十有四人嗚呼高朗令終寵靈顯赫會元公之殯送文恭之喪極人臣之盛公以臣嘗豫寮舊屢刊史謀爰有治命請誌幽礎仰奉宸旨不獲固辭謹作銘曰

兵政宥密機軸穹崇惟公再踐昭事功兮將鉞在庭相

印垂組惟公保釐兼文武兮洪鑪造物威柄御人惟公
三八秉國均兮龍章在躬庭槐表位惟公經邦極名器
兮帝師尊異內樞隆顯綈以印章豐贈典兮乘輿縞素
笳吹悲鳴送以纁玉盡哀榮兮

故順容邵氏墓誌銘

大中祥符九年春二月甲午順容邵氏薨于京師太和
宮本院之正寢越三月壬子葬于開封縣清遠鄉繁臺
村奉先資福禪院之東北原嗚呼哀哉順容諱昭明廣

陵人也生稟嘉慶賦質柔和泳漢方江動謠於南國規
圖照史秘景於華宗先聖在潛懿藩初建金房入侍實
首於庶姬璿室沉英嘗悲于外館洎攀鱗上漢列職司
衣奉謁襲之宜辨采章之品肇封近郡寔啟博陵爰以
燕寢獻功女侍更直佩環異等禮序多儀迺進號於小
君實並長於九御被之紫服昭以寵章矧屬草輅弔民
躬平大鹵宸旒耀武出撫魏都束帶從行羽書狎至罄
宣懿立以及凱旋繇是賜塗金之裳陞榮于太監闡冀

國之壤列位於尚宮肅奉曾闈總司衆職嚴莞簞於局
禁謹琮璽于緘滕法式並修出納惟允暨夫白雲厭代
蒼震承祧改滎波之邑封奉壽宮之象設西陵極望莫
從于神遊中禁言旋復司於舊物逮珍符錫瑞之紀號
喬岳上封之明年超踐宮正之資載䟽安陸之國翼宣
忠訓糾肅羣居閑練典章詳明啟奏下推耆重之德上
嘉該總之能遂開張楚之封特拜司宮之命寔創斯號
以旌厥勞然而進退有常終始一志含華凝曜久冠於

小星積德累勤繼充於彤史上肇崇位置尊獎老成寵
以絳袍列於嬪職翟鈞九等班亞三妃感泣帝宸賜予
加數承顏如幄進見異儀宮掖之榮近代無比旋以憂
勞成疹年德寢高深惻上仁遷居別館勉膳之使承詔
之醫自冬涉春相望於道嗚呼收華麗日喪淑泉局常
珍之期不及者二歲嚮用之福咸備于一時黼帳悼懷
椒塗頌賄佳城既卜幽隧將封爰詔左言圖徽沉碧銘

曰

瑶臺降芬甘棠遺慶德茂材淑性資淵今參華六列盡
瘁兩朝閑練儀範勤勞夙宵徹序方隆餘年奄謝結戀
昌期銜哀長夜圖形藥館卜宅金園飾終之典永賁重
原

皇姪康州團練使夫人呂氏墓誌銘

夫人呂氏故丞相贈司徒正惠公之女正惠公之貴也
曾祖袞贈中書令祖琦贈太師尚書令其先太岳述職
仰悟靈心尚父表海下因舊俗景祐垂世積德在人門

生忠賢亦啟明淑夫人夙稟家訓幼勤女職動則申禮
保阿是咨烝而獻功絃綖悉備言念詩史之意步中珩
璜之節加以文繡設色必窮其麗哀箏度次尤盡其音
國家璿源熾昌仙緒蕃衍選建明德廣封連城棣萼相
依犬牙錯峙上隆惇叙之化下嘉信厚之風扶植基幹
畢侯支庶崇右戚之惠盡家人之愛至若宗子授室王
姬下嫁必選令族以納多祥楚王親則帝兄位極人爵
寶玉分器芝蘭在庭其第四子天水郡公允誠生稟粹

和早聞詩禮懷金上序結綬內朝號為宗英特茂宸寵
始娶贈邠州觀察使潘惟正女不幸早亡宗臣上言禮
當繼室上乃念正惠之昔佐先帝厥有大勞當綴衣之
辰受傳聖之命寢丘之封雖遠高門之慶未移乃詔申
以婚姻寵其閥閱枚卜獻吉踰八世之祥大璋納禮豐
六版之數夫人遂以大中祥符五年夏六月乙丑召見
漢幄進對堯門象服暉華拜賜于中禁油輶擁從言旋
於舊居觀者榮之忠臣知勸越明年秋七月辛亥歸于

郡公六珈盛飾百兩親迎僕御授綏傅姆加景華燭光
焰煌煌如晝從者畢衫初初若雲有司相儀太官供具
婚姻之禮特盛於茲洎五月中叅三月廟見象掃居手
寶翟在衣動止肅雍詞氣舒婉式瞻貴里為憲宗家若
乃薦豆公侯之宮胖載舊姑之室匪雞之勤儆戒惟絲
之求善匹蘋藻之意柔潔山河之體容潤固已極圖傳
之言豈止率擊禱之訓者哉方將下司封之詔舉從夫
之典啟湯沐之邑增車服之數而薜華易落隙駒難駐

德宮永逝雖大化之攸同碩人無子痛芳音之莫繼嗚呼哀哉以七年秋九月壬寅終於內寢享年十九尚宮賜祔輟朝二日權厝於奉先資福禪院以天禧元年八月己酉葬于河南府永安縣南訾鄉漫流村潘夫人墓之西北原從吉卜也詔左騏驎使澄州刺史入內侍省都知張景宗營葬事以著作郎直集賢院徐奭攝大鴻臚監護斂封有日執紼將行乃命史臣圖芳幽礎銘

曰

降神靈緒賜履遙源間生邦媛選儷宗賢顧史永箴披
圖問禮德盛年闕華繁實委梁臺遣奠兮組帳煙空文
園安宅兮松路塵封哀蘭儀之永閔唯玉譽之無窮

文莊集卷二十九

欽定四庫全書

文莊集卷三十

宋 夏竦 撰

古詩

奉和御製看毛詩詩三章二章十二句一章八句

周道洽平聲動文成周王棄善俗移風變哀樂異心治
亂殊音心發言從影響攸同政行音類壘笮靡異實教
化之所由故能經乎天而緯乎地

生民尊祖時邁告成江漢撥亂鳧鷖持盈四詩之道始
于和平五際之變通于晦明宣宥密之基命敷邇駿之
休聲或箴規于闕政或歎咏于芳馨

溫柔之教政治之源替能誦兮可以諫士不學兮無以
言蓋盛衰之所繫故諷諭之攸存惟聖心兮垂思永大
庇兮元元

奉和御製迎聖像中路獲金龍送還茅山

巍巍真像範金成瑞節蒙舟遠導迎精衷勵翼符神貺

藻衛葳蕤率禮經蘭隄曉景漣漪靜神龍報降祥雲映
雙上瓊干采質明旁臨旌棧靈輝盛白臣祇肅薦華薌
承賀凝貞拜露章羲氏官名高可擬漢家年紀遠難方
鳳蓋分陰騰九色蜿蜒共戲雲裳側御天飛躍世空聞
瑞德縈盤今始識駸駸矯首仰中宸丹宸深嘉美應臻
紓禮既能疇聖日為霖當使福蒸人華陽翠壑貞靈地
星使送還彰睿志更播雲章入管絃昭昭億載傳金匱

奉和御製崇政殿宴從臣

青綺禁門符命錫離珠御府天琛積兩儀流慶會休期
二聖詒謀歸盛德大禮修真猷格懿鑠昭昭兮靡極阜
民財形物力聖志乾乾兮夕惕金扉玉宇麗皇居鳳藻
鸞蹤輝樂石龜趺螭首建靈辰鵲尾龍香奉至神日轉
翠華臨閣道天旋丹仗復鈎陳縉紳茂寵兮踰三接羽
衛鴻儀兮備九賓瓊觴傳滿兮均堯酒栢殿賡颺兮洽
漢臣奉若靈心彌翼翼布昭釀化愈淳淳

奉和御製為政歌

黼帳夜分常監寐鳳軒端委敷文治肇建元封陟介丘
寢尋宓祀臨汾水茂烈馨香久際天精心勵翼彌恭已
體道推仁洽惠和斷凋歸厚蠲華侈懷柔四貊盡來庭
邊圉無塵似平砥堯德欽明惇茂族漢條寬大措祥刑
永觀禹畫同文軫更佇虞巡審量衡睿政無為猶日慎
布昭謨訓掩湯銘

奉和御製奉先歌

皇家兮仙祖上世兮聖神承雲兮分治駕羽兮臨民誕

昭兮馨烈高陟兮元真載乘土運臨三古屬象羲農振
遐武爰炳明靈陟上蒼繇繇聖緒慶悠長既積仁兮累
德爰振耀兮流芳罄二儀兮垂祐彌萬祀兮開祥巍巍
烈祖兮膺宸厯御瑤圖兮建鼇極東征西怨兮振羣黎
下舞上歌兮康庶國優游亮直顯敦仁錫羨休嘉符拓
迹四貊名王尺組羈九涯遠道安車適聖功者定實登
三方賁駿奔惟旅百赫赫神宗廓帝紘昭廣運兮洽和
平禮適素青兮泐夏子化歸醲粹兮復胥庭憲六學兮

昭地緯事七廟兮奉天經震疊威靈兮踰朔幕汪洋惠
露兮浹編氓偃節靈臺兮黜武漏魚寬網兮蠲刑三葉
緝熙兮隆紹繼皇穹右序兮隕繁祉徘徊颺兮授元
符焜燿樵蒸兮修茂禮思文成頌兮迪先謀多忝申歌
兮昭樂歲叅侔開闔已無為虔鞏盈成彌若厲惟寤寐
兮符通實天人兮合契降僊馭兮自三清諭靈源兮踰
百世遐錫鴻休茂本枝永符盛德昭明類薦嶽冊致清
衷齋明兮顯至欵太空告繁禧監觀兮斯暨對越兮儲

金定四庫全書
卷三十
精聿懷兮忘寐烏奕千齡播德芬欽崇茂典協經綸神
化有開彰密命慶基無際等高旻

奉和御製筆歌

制之精兮漢宮之雙管鋒之妙兮趙國之修毫自承掌
握濟羣用觚與槧兮難施勞古今罔不達淑慝將何逃
深仰玉蟾均硯滴詎慚金馬制書刀頡皇觀迹蟲篆興
纖端積潤八體成寫圖始告姬公瑞錯寶終傳路扈名
上聖惟聰炳帝文宸章奎畫冠生民灑翰翠珉垂睿式

珥彤丹地寵儒臣

奉和御製硯歌

南方潛璞出寒溪沉沉紫蔚凝堅姿兩儀肖象磨礱異
三趾承隅琢飾竒銀帶參華貢雙闕玉蟾分滴潤圓池
微波澄淡當晴景旌旗半浸龍蛇影輕浮春絮拂犀翰
微動日華明綺井藥簡交輝九禁深玉枝斜照中宵永
列璇臺兮今得地邇清光兮叶靈契宣絲旨兮揚聖謨
贊雲章兮熙睿志彌彰盛德冠生民務以文明化兆人

奉和御製墨歌

昔造圖書兮紀方志鉛黃丹漆兮初為貴後世增華兮
邁昔賢松煙布色兮明且妍一枝均賜官儀備九子兮
形吉禮全寫功詠德盈緗帙體物緣情徧綺牋陰山潛
璞兮琢金池相須藝圃兮事攸宜湘川青管兮東圓鋒
並列璇臺兮用本同垂大訓述微言孔墨之教兮長存
騰藻翰贊儀形淵雲之妙兮惟精上聖敦仁崇儉約厥
篚珍竒詔皆却唯許隄靡歲貢臻式彰文德化生民

奉祀禮畢還京

先天密命啟禎期侯日靈文降紫闈恭館靖冥尊妙化
帝居齋祓擁純禧勒鴻昭姓增梁甫報本祈年款魏睢
真御下臨彰日監嘉生誕降示天隨丕承寶緒增寅畏
惠迪靈猷務肅祇國陽郊報尊天位欽奉后祇將合祭
仁里爰瞻嚴父祠徐鑿式徇黎萌意攸司經始兮載嚴
象物應斯兮紹至熒煌先道兮珍符煥衍參塗兮藻衛
真場合奏兮笙鏞靈趾欽柴兮圭幣三氣晬容兮仰覲

八景飛輿兮降格青祺簡簡兮淵冲瑞命襍襍兮山積
合飲譙城洽睿慈仁風溥暢宣和懌制畿睢水煥先謨
惠露汪洋敷潤澤納賈陳詩兮總舊章念功繼絕兮昭
明德近甸回衡景念新太宮歸格物華春太和充鬱層
霄外協氣周流率土濱穆穆天章騰聖域巍巍道蔭庇
生民體元化叙彝倫順則兮穹旻觀祕奧守精真謹度
兮聲身四貉兮來同千齡兮應會甘實兮積中英莛兮
發外皇哉曼壽保丕基青簡遐昭帝者儀道冠周詩心

翼翼功踰夏載日孜孜

奉和御製玉清昭應宮甘露歌

祝聖清場初展禮鴻都向曉彰繁祉鬱鬱纖枝正後凋
穰穰瑞采俄零委吉雲五色比還踈况是嚴冬歲律餘
承以玉杯甘若蜜凝于翠幄皎如珠薦宸居稱壽酒宜
大慶兮仰歸元首香馥馥旆央央建靈壇兮茂對多祥
天心信與人心會誕節將臨遽霑霈式昭真蔭祚君王
永錫遐齡齊覆載

奉和御製宣讀天書

赫赫穹符迪慶基
巍巍真緒擁繁禧
控飈靈御傳天意
候日珍文告帝期
奉詣喬丘彰錫祉
昨壤瀨鄉修茂禮
宸闈薰祓歎雲興
戎候耕耘纒象弭
紀號惟新歲歷呈
三元初吉協休辰
徽冊奉天熙事歲
丕名尊祖皇儀展
太宮薦鬯孝思伸
陽位升煙鴻慶遠
瑞應紛綸百福同
寅威寶命務尊崇
布宣精意誠明顯
申飭攸司憲度隆
將披祕蘊昭靈契
欲使萬方知帝意
肆青端門詔畢旋

靈場預啟百枝燃夙陳路寢敷瑶席躬薦真香奏瑞煙
三辰淳耀居齋室階滿祥莫當望日大裘陟降既登歌
羣后延登皆上笏元輔披滕聖訓揚樞臣援翰寶文彰
有虞出洛龜休躍唐氏銜圖鳳罷翔辭若洞章皆槌句
字如龍篆宛分行森沉虎旆嚴真衛肅穆珠旒增潔志
敬受丹書宣易俾式旌玉刻誠難繼修修羽帳降星辰
杳杳飈旂駐聖真庭際煙霞輝睒睒天中鸞鶴羽旒旒
微密妙言爰備舉龐鴻盛則已宣臻一一嘉猷保元后

諄諄深旨為含生寫成別笈緘藏密薦獻禮周彌襲吉
恍恍真心顯道樞穰穰景佑歸宸歷升聞璿宙洽神歡
昭紀琅函為睿式萬靈潛衛極寅威九序相趨皆勵翼
繇寓彌隆清淨風虛晨益鑿馨香德豈獨飛英冠百王
祇延道蔭永歡康薰弦濟發南風詠丕顯清衷報彼蒼

奉和御製幸金明池

朱輅乘時兮出曉烟飛梁承幸兮斗城邊幔省蔭堤兮
楊葉閣星旄藻岸兮物華妍珠網金鋪兮豫章館風檣

桂楫兮木蘭船象潢儀漢兮澄波遠激水尋橦兮妙戲
全佇帝暉兮凝制蹕人煥衍兮歡心逸嘉流景兮延邇
臣樂清明兮麗新曲

奉和御製七夕

紫皇宴服出瑤臺仗下涼宵水殿開初月上弦光汎灑
橫河案戶勢徘徊扇分蘭露侵衣滴簾捲天香拂帳來
閣道森沉飛絳節龍璫鳳吹凌霄發琥車縹緲際煙濤
鈎砌迢迢望雲闕百子池深列宿分九微燈淡織塵絕

雲屏輕筵貫雙針彩縷縈風勢不任露挹瓊蘇敷碧席
明霞照地光無極西漢元封五葉時猗蘭雲輦會真期
何如法坐嘉蕃熟高振薰絃播緝熙

黃鶴樓歌

城上危樓高縹緲城下澄江復相繞有時漾影入中流
俯看魚游仰飛鳥近樓多少未行舟滿江落花灑汀洲
人同江狎不怕浪登樓對酒彈箜篌大別山頭白雲起
金口渡邊雨如洗半鈎新月上孤城還照高樓與江水

晴江依舊瀉潯陽黃鶴無由歸故鄉一聲玉笛起何處
燕撲闌干花影長



文莊集卷三十